

www.BibleForChildren.org

Mateo 26



As nan hiyachi,
unum pay ay urkiw
sakbay nan Fiastan
chi Munlausan. Inmuy
cha Jesus ad Betania ay
ilen Lazaro ay tenakuna
manipud as nan utúy.
Angkiay ya hi Maria at
enarana nan kakudwan
chi litro ay nanginngina-an
ay fiangfiangru ay nardu ay maid
naekaskaslang. Inkuyagna as nan
sukén Jesus, angkiay inpunasna nan fookna. Nan
fiangruna at nunwaras as nan intiru ay afong.



Angkiay ya hi Judas Iscariote ay usa as nan hinpuru ya chuwa ay disipulus at inmuy as nan anap-apon chi papachi ta esepsepna hi Jesus kan chicha. Naragsakancha as nan nanngorancha as nan kenalina, ya enkaricha ay ichatcha nan siping kan hiya. Isunga nun-anap hi Judas as ustu ay chansa ay mangesepsepana kan Jesus.



Enkaman tit-iwa nan disipulus
nan infilin Jesus ay atuncha, ya
ensakianacha nan manganan as
nan Fiastan chi Munlausan. As nan
chacha manganan, enaran Jesus nan
tenapay, ya nunyaman kan Apo Dios.
Pinutput-ingna, angkiay inchatna as
nan disipulusna, ya kanana,
"Araunyu ta kanunyu.
Hiyana nan
achorku."



Angkiay ya enarana nan tasa ay
natotorwan as maikop. Kun pay
narpas ay nunyaman kan Apo Dios,
inchatna kan chicha, ya kanana,
"Umikop kayu am-in as na. Hiyana
nan charak ay mangepasiguradu
as nan fiarú ay nakiturakian Apo
Dios as nan tataku. Omayastu
as nan matuyak para
as nan ongor
ay tataku ta
mapakawancha
as nan
fiasfiasorcha."



Angkiay kenalen Jesus kan Simon Pedro, "Simon, Simon, chumngorka. Naparufusan hi Satanas ay manisting kan chakayu am-in ta masisiyan kayu ay kaman as nan maisiyanan nan fukias as nan chuki. Ngem enkararakiaak he-a, Simon ta achi mamaid nan pammatem."



"As nan munfiangcham kan ha-un, masapor papigsaum nan pammaten nan iib-am." Tinumfor hi Pedro, "Apo, nakasakianaak ay maetapi kan he-a ay maifiarud ya matuy." "Ifiakiak kan he-a, Pedro," kenalen Jesus, "Achintu munkokakok nan ka-or ad wani inkiana mamitluwak esaot kan he-a."



Angkiay ya inmuy hi
Jesus ay kadwana nan
disipulusna henan lukiar
ay makali un Getsemani,
ya kanana kan chicha,
"Etokoryu hena ta uyak
munkararag hid-i."
Enkararagna, "Ama, nan
am-in at kafiaelam.
Kaanum koma kan ha-un
nan nauy omali ay likiatku.
Uray mu assena, fiakun
challu nan laychok
nan maekaman,
ngem nan laychum."




Isunga inmuy hi Judas hid-i ay nangepangu as nan
usa ay bunggoy nan sosorchachu ay i-Roma, nan
kukuwarcha as Templo ay infiaor nan anap-apon
chi papachi ya nan chiyuycha Fariseo.

Nangaparorcha, nangapenakadcha,
ya nangaarmascha. As nan

hiyachi, finakag nan usa as
nan disipulus nan fiabfiaarun
nan kangatuwan ay pachi, at
nakingasan nan kannawan ay
ingana. Ngem kenalen Jesus
kan chicha, "Ustu sa!"

Angkiay ya kenpana nan
ingan nan mafiabfiaor,
at enpaammayna hiya.



Angkiay ya tiniliwcha hi Jesus, ya inyuycha as nan afong nan kangatuwan ay pachi. Kun pay hi Pedro, inmun-unud ay tenmataak.

Kun pay naiyapuy as nan kiawan nan fiattaw, uy naketokor hi Pedro as nan chiyuycha cha mun-an-anichu.



Wacha hid-i nan usa as
nan fiabfiarun nan
kangatuwan ay pachi
ay ib-an nan laraki ay
kiningsan Pedro nan
ingana. Senarudsudna,
"Ay fiakun he-a nan inilak
as nan kawad-an nan kakkaiw
ay olivo ay nakekakadwa kan
Jesus?" Ngem kasin ensaot
Pedro chi. Hiya at chi ya
nunkokakok nan ka-or. Angkiay
ya pinmitiw hi Pedro, ya
nunsidlay akorna.




Angkiay ya nalgawat nan am-in ay
membron nan Sanhedrin, ya
inyuycha hi Jesus kan Gobernador
Pilato. Senarudsud Pilato kan Jesus,
"Ay he-a nan aren chi Judio?"


"He-a nan nangali un
ha-un," ensongfiat
Jesus. Naketakiatfor
kasin hiya as nan tataku,
tay laraychun Pilato ay

mangilufus kan Jesus.
Ngem infugfukiawcha,


"Epaelansam as nan koros!
Epaelansam as nan koros!"



Kun pay as nan anongos, inpurang
Pilato hi Jesus kan chicha ta
maelansaas nan koros. Nan
sosorchachu at enpasakfiatcha kan
Jesus nan korosna, ya inyuycha hiya
henan lukiar ay makali un Lukiar nan
Tong-or chi Uru. Nan ngachana as
nan kalen chi Hebreo at Golgota.




Hid-i nan nangelansaancha kan Jesus
as nan koros. Wachacha us nan chuwa
ay enlansacha as nan koroscha,
usa as apét kannawan
Jesus ya nan
usa as apét
kannikidna.



As nan hiyachi, namaid nan lawag nan urkiw, ya
narakset ay nakudwa nan kurtinan nan Templo
nunlapu as lamagna inkiana as kuwabna.

Angkiay inpigsan Jesus ay
nangifukiaw, "Ama, ichatku
kan he-a nan lenawak."

Kuna pay narpas ay
kenali na, natuy hiya.



Hi Jose ay i-Arimatea at naturud ay
inmuy kan Pilato, at chinmawat
as pammarufus ay arauna
nan achor Jesus. Hi
Jose ay anna at
usa ay machayaw
ay ap-apon
chi Judio ay

manman-ud as
nan omaliyan nan
muntorayan
Apo Dios.



Lenmaku hi Jose as am-ammay
ay lopot. Enpaksopna nan achor
Jesus, at penotepotana
as nan hana ay lopot.

Angkiay ya
enpaipuuyna
as nan lufok ay
natuktukan
ay chupras.


Kun pay narpas,
enpaulina nan
ad-acha ay fiatu
ay nanangubna
as nan lufok.




As nan kafikiatana as nan
narpasan nan Urkiw
nan Munsakianaan
para as nan Urkiw ay
Mun-iblayancha, inmuy
nan anap-apon chi
papachi ya nan
chiyuycha Fariseo
as afong Pilato.



Kenalicha, "Apo Gobernador
manumnummi nan kenalen
nan enmallilaw ay anchi
as nan natatakuwana
pay laingay kanana un,
'As nan maekatlu ay
urkiw at matakuwak
manipud as
nan utúy.'"




"Isunga inmuycha, ya
inpuuycha nan maton as
nan unub nan lufok ta
mailatu mu wachay
mangulin. Hacha at
epakuwarcha as
nan sosorchachu."



Kun pay inmuy nan Urkiw ay
Mun-iblayan as nan wi-ewi-et
as nan Chumingku, inmuy
cha Maria Magdalena ya
nan usa ay Maria as
nan lufok Jesus.

Kalina at ya
nunkichu as
napigsa,

tay kinmuwab
nan usa ay
anghel Apo
Dios ay nurpu
ad chaya.



Inulina nan fiatu ay tangub
nan lufok, at tenokorana.
As nan nangil-an nan
chiyuycha sosorchachu
as nan anghel,

penmayagpagcha
ya nunlukfubcha
ay kamancha
nanatuy kiapú as
nan nunsidla ay
ugyatcha.



Kenalen nan anghel as nan fianafiai,
"Achi kayu umugyat, tay ammok
challu ay chayu anapun hi
Jesus ay naelansa as nan
koros. Maid hiya hena,
tay nataku manipud
as nan utúy ay
kaman as nan
infiakiana.



Akayu, ilaunyu nan
naesasad-ana."



Isunga kenamon nan fianafiai ay
nak-ak as nan chiyuy lufok. Uray
mu inmuugyatcha, naragsakcha
challu. Angkiay ya
tenmagtagcha ay uy
mangifiakia as nan
disipulusna.



As nan chacha tomagtakian, kalina
at ya sinib-at Jesus chicha, ya
kanana, "Komosta kayu?"
Naesnopcha kan hiya, ya
nunpalintumangcha ay
nangchun as nan sukina,
ya nunchayawcha kan hiya.





Angkiay ya, nunpaila hi Jesus as nan hinpuru ya
usa ay disipulus as nan chacha manganan.
Senengarana chicha kiapú ta maid pammaticha
ya natangken chi numnumcha, tay chaancha
enafurot nan infiakuan nan chiyuycha nangila
kan hiya as nan natakuwana manipud as nan
utúy. Kun pay narpas ay naketakiatfor hi Apo
Jesus kan chicha, naetag-uy hiya ad chaya, at
tenmokor as apét kannawan Apo Dios.



Kiapú ta laylaychun
Apo Dios as solet nan tataku asna's
luta, inchatna nan us-usa ay Anakna ta
nan uray ngachana ay omafurot kan
hiya at achi machusa ay maisiyan
kan Apo Dios, ngem mawad-an
as fiyag ay maid
patingkiana.



Roma 3:23 Tay am-in ay tataku at finmasorcha, at kinmurangcha as nan panang-aprobar Apo Dios kan chicha.

Roma 6:23 Tay nan elagfon nan fiasor as nan chiyuycha fiabfiaaruna at utúy ay maid patingkiana. Ngem nan ichat Apo Dios at fiyag ay maid patingkiana babaen as nan nakius-usaan takú kan Cristo Jesus ay Apo takú.

Hebreo 9:27 Naituding nan taku ay matuy as mamingsan. Angkiay ya okomún Apo Dios.

Efeso 2:8,9 Tay kiapú as nan grasyan Apo Dios at naesarakan kayu babaen as nan pammatiyu kan Cristo. Fiakun kiapú as nan mangesarakananyu as nan mismu ay achoryu, ngem kun at inchat Apo Dios. O, fiakun kiapú as nan mismu ay ekamkaman takú ta maid poros atun takú ay mangepangas as nan kaesarakanan takú.



Roma 10:9,10 Mu ipudnuyu ay afurotunyu ay hi Jesus nan kangatuwan ay Apo ya mu tit-iwa ay afurotunyu ay tenakon Apo Dios hiya manipud as nan utúy, maesarakan kayu. Tay mu tit-iwa ay omafurot takú, ifilang chitaku kan Apo Dios as nalintig, ya babaen as nan mangipudnuwan takú ay omafurot takú at maesarakan takú.

Juan 3:16,17 Kiapú ta laylaychun Apo Dios as solet nan tataku asna's luta, inchatna nan us-usa ay Anakna ta nan uray ngachana ay omafurot kan hiya at achi machusa ay maisiyan kan Apo Dios, ngem mawad-an as fiyag ay maid patingkiana. Tay chaan finaor Apo Dios nan Anakna asna's luta ta keddengana ay manusa as nan tataku, ngem kuna at finaor ta maesarakancha babaen kan hiya.



1 Juan 5:11-13 Nauy nan pammaneknek Apo Dios:
Inchatna kan chitaku nan fiyag ay maid patingkiana,
ya nan Anakna nan nurpuwan nan nauy ay fiyag.
Nan taku ay mawawacha as nan Anak Apo Dios at
wacha kan hiya nan nauy fiyag ay maid patingkiana.
Ngem nan taku ay achi pay laing mawawacha as
nan Anak Apo Dios at maid kan hiya nan nauy fiyag.
Isuratku na kan chakayu ay omafurot as nan Anak
Apo Dios ta maammuwanyu ay wacha kan
chakayu nan fiyag ay maid patingkiana.



Mateo 26-28; Lucas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Bontok, Eastern (ebk) © 2003, Wycliffe Bible
Translators, Inc. All rights reserved.

<https://www.bible.com/bible/1114/MAT.1>

©2026 Bible for Children, Inc.

www.M1914.org

www.bibleforchildren.org

